

# KAKO SE UZIMA ABDEST

4.1 Kada želiš uzeti abdest, zanijetiti ga srcem, jer se djela vrednuju po nijetima, prema unutrašnjim namjerama, izgovori Bismillah zatim operi šake tri puta vodom, prvo desnu pa lijevu Allahov Poslanik, s.a.v.s., kaže: "Kada uzimate abdest, počnite sa vašom desnom stranom."

4.2 Madmada- Pranje usta : Izaperi usta (desnom rukom) tri puta vodom, uzimajući vodu iz desne šake.

4.3 Istiňak – pranje nosa : Izaperi nos (lijevom rukom) tri puta vodom. Prilikom čišćenja nosa uvući vodu u nos uzimajući vodu iz desne šake a zatim izbaciti iz nosa koristeći pri tome lijevu šaku.

4.4 Pranje lica : Operi lice tri puta od uha do uha i od korijena kose na čelu do vrha brade, za one koje imaju bradu provući prste kroz bradu.

4.5 Pranje ruku : Operi tri puta ruke od vrhova prstiju do iza laktova, prvo desnu pa onda lijevu.

4.6 Potiranje glave(mesh) - Potari glavu vlažnim rukama jedanput, počevši sprijeda nazad i obratno.

Prilikom potiranja glave mokrim rukama prvo početi sa prednjom stranom, jer u hadisu stoji da je Allahov Poslanik, s.a.v.s., svojim rukama potrao glavu tako što je počeo sprijeda glave i povukao ih do potiljka, a zatim ih vratio nazad."

4.7 Potiranje ušiju(mesh) - Potari uši, kažiprstom unutrašnjost, a palcem vanjski dio. Allahov Poslanik, s.a.v.s., potrao je uši tako što bi kažiprste stavio u uši a palčeve iza ušiju."

Ruke se ne kvase za potiranje ušiju već se odmah nakon mesha po glavi potiru uši, bez ponovnog kvašenja ruku.

4.8 Pranje nogu - Operi noge tri puta od vrhova prstiju do iza članaka, desnu pa lijevu.

Uzvišeni Allah kaže: "... i noge svoje do iza članaka..." (El-Maide, 6.)

Allahov Poslanik, s.a.v.s., je rekao: "Kada uzimaš abdest, istrljaj između prstiju."

Sunnet je da se to čini malim prstom lijeve ruke.

Prenosi se od El-Mustevreda b. Šeddada, r.a., da je rekao: "Vidio sam Allahovog Poslanika, s.a.v.s., da pere prste nogu malim prstom njegove ruke."

4.9 Poslije uzetog abdesta proučiti:

"Ešhedu en la ilahe ilallahu vahdehu la šerike lehu ve ešhedu enne Muhammeden abduhu ve resuluhu. Allahummedž'alni minet-tevvabine vedž'alni minel-mutetahhirine."

(Svjedočim da nema Boga osim jednog jedinog Allaha, koji nema nikakva sudruga i svjedočim da je Muhammed Njegov rob i Njegov poslanik. Allahu, učini me od onih koji se kaju i učini me od onih koji se čiste.)